

# AKHLAK WARISAN RASULULLAH S.A.W MEMBAWA KEMULIAAN UMAT

Oleh:

Asming Yalawae<sup>1</sup>

Ahmad Farid bin Ibrahim<sup>2</sup>

## Abstract

*The article aims to discuss the concept of Islamic morality which forms an excellent heritage from the Prophet Muhammad s.a.w. for his Ummah in achieving dignities and honourables in this world and hereafter. It also discusses the role of this Islamic morality and its influence to human's life.*

## PENDAHULUAN

Akhlak merupakan warisan maknawi Rasulullah s.a.w. yang amat bernilai dan istimewa. Ini kerana Rasulullah s.a.w. itu sendiri dibangkitkan oleh Allah S.W.T. untuk menyempurnakan akhlak. Rasulullah s.a.w. diibaratkan sebagai penyempurna atau pelengkap bagi sebuah bangunan yang masih belum siap dibina, atau dalam erti kata yang lain kebangkitan Rasulullah s.a.w. kepada umat ini untuk menyempurnakan akhlak. Justeru Rasulullah s.a.w. adalah seorang yang memiliki ketinggian dan keagungan akhlak. Allah S.W.T. memuji Baginda dalam al-Qur'an al-Karim yang bermaksud:<sup>3</sup>

*Dan sesungguhnya kamu benar-benar berbudi pekerti yang agung.*

Berkaitan ini kata al-Ṭabarī: “Allah S.W.T memuji terhadap ketinggian adab dan budi pekerti Rasulullah s.a.w.”<sup>4</sup> Adab yang baik serta bermoral tinggi

---

<sup>1</sup> Asming Yalawae (PhD), adalah pensyarah di Fakulti Pengajian Kontemporari Islam, Universiti Darul Iman Malaysia, Kampus Kusza, Terengganu.

<sup>2</sup> Ahmad Farid bin Ibrahim (M.A), adalah pensyarah di Fakulti Pengajian Kontemporari Islam, Universiti Darul Iman Malaysia, Kampus Kusza, Terengganu.

<sup>3</sup> Surah al-Qalam 68:4.

<sup>4</sup> Abū Yaḥya Muḥammad ibn al-Tujībī (1991), *Mukhtaṣar al-Imām al-Ṭabarī*,

juga merupakan “gedung simpanan rahsia agama”. Dengan ini akhlak melambangkan rahsia ketakwaan dan ketinggian agama bagi seseorang.

Selain dari itu akhlak juga merupakan asas memperbaiki perangai, adab dan kesempurnaan peribadi, membina diri dan ciri-ciri mendapat hidayah dan petunjuk dari Allah S.W.T. serta kecenderungan kepada al-Qur’an al-Karim. Akhlak merupakan asas bagi suatu bangunan kerana bangunan tidak dapat ditegakkan dengan baik serta kuat tanpa asas yang kukuh. Begitulah seorang manusia jikalau tidak mempunyai moral yang baik atau akhlak yang sempurna sudah tentulah tidak lagi kelihatan cantik atau menarik. Benarlah bak kata pepatah Arab segak atau cantik seseorang manusia itu terletak pada adabnya. Selagi seorang itu tinggi budi pekertinya maka selama itulah akan kelihatan menarik pada rupanya. Begitu pentingnya akhlak dalam kehidupan manusia. Melaluinya manusia dapat mencapai kemuliaan. Ini kerana Rasulullah s.a.w. sendiri diutuskan kepada umatnya untuk menyempurnakan akhlak.

## DEFINISI AKHLAK

### *Dari Segi Bahasa*

Akhlak dari sudut bahasa berasal dari kalimah *al-Khuluq* dengan dibariskan *lam* di hadapan atau sukunnya, iaitu beragama atau tabiat atau perangainya.<sup>5</sup> Dikatakan *Akhlāq al-Rajul idhā ṣāra Akhlāqan* iaitu dikatakan: Seorang lelaki yang berakhlak apabila ia mempunyai akhlak.<sup>6</sup> Dalam kamus *Junior English Dictionary* ada menyebutkan tentang akhlak sebagai: “*having to do with character or behavior, especially right behavior*”. Maksudnya, melakukan sesuatu dengan fikiran atau budi pekerti, lebih-lebih lagi budi pekerti yang baik atau disebut dengan *high moral standard*, iaitu kemuncak ketinggian akhlak.<sup>7</sup> Manakala kamus *Larousse De Poche* yang berbahasa Perancis mendefinisi mengenai akhlak sebagai: *Morale: ensemble des regles a suivre pour fair le bien et eviter le mal*.<sup>8</sup> Iaitu persepakatan di antara melakukan kebaikan dan menjauhi keburukan.

Dengan ini jelas akhlak dari sudut bahasa ialah satu kelakuan yang baik yang menggambarkan seseorang itu beragama yang lahir dari watak dan tingkahlaku yang baik. Semua ini sudah tentu hasil dari persepakatan di antara melakukan kebaikan dan menjauhi dari keburukan.

---

Beirut: Dār al-Fajr al-Islāmī, h. 564.

<sup>5</sup> Ibn Manzūr (1997), *Lisān al-`Arab*, jil. 2, Beirut: Dār-Ṣadir ,h.304

<sup>6</sup> *Ibid.*.

<sup>7</sup> *Junior English Dictionary* (t.t.), Selangor: Percetakan Strikeway, h. 378.

<sup>8</sup> *La Rousse de poche* (1979), Paris: Librarie Larousse , h. 271.

### *Dari Segi Istilah*

Akhlak dari segi istilah ialah satu ibarat dari kelakuan diri yang tetap dan terkeluar daripadanya beberapa perbuatan dengan mudah serta senang tanpa memerlukan kepada pemikiran dan riwayat. Jika kelakuan itu terkeluar daripada perbuatan yang elok dari segi syarak dan logik akal dengan mudah, maka dinamakan kelakuan itu akhlak yang baik. Jika kelakuan itu terkeluar daripadanya perbuatan yang keji, maka dinamakan kelakuan itu akhlak yang buruk.<sup>9</sup> Al-Ghazālī ada menegaskan mengenai akhlak iaitu:

*Satu sifat yang tertanam dan sehati dalam jiwa seseorang, menghasilkan segala perbuatan dengan mudah (spontan) tanpa memerlukan pertimbangan fikiran (teragak-agak). Sekiranya akhlak itu baik menurut pertimbangan al-Qur'an dan al-Sunnah, maka baiklah ia. Sekiranya buruk mengikut al-Qur'an dan al-Sunnah, maka buruklah ia.<sup>10</sup>*

Dengan ini jelas akhlak ialah kelakuan yang lahir melalui perbuatan seseorang dengan mudah dan senang tanpa memerlukan kepada fikiran. Maka kelakuan tersebut terbahagi kepada dua iaitu kelakuan baik dan buruk. Kelakuan baik merupakan akhlak yang baik, yang juga merupakan sifat utama para nabi, rasul, *ṣiddiqīn*, para syuhada' dan *ṣāliḥīn*. Akhlak yang baik itu ditegakkan di atas dasar buat perkara yang baik dan meninggalkan apa yang dilarang oleh Allah S.W.T.

Akhlak buruk ialah penyakit hati yang dapat menghalang manusia dari mencapai keberkatan Allah S.W.T., ketenangan dan ketenteraman sama ada di dunia ini seterusnya di akhirat nanti. Penyakit ini merupakan aset utama yang dapat mendatangkan keluh-kesah dan ketidak tenangan bagi seseorang itu. Allah S.W.T. sentiasa menambahkan penyakit bagi seseorang yang mempunyai penyakit dalam hati sebagaimana firmanNya yang bermaksud:<sup>11</sup>

*Jika dalam hati mereka ada penyakit, maka Allah S.W.T. menambahkan lagi penyakitnya itu.*

Berkaitan ini `Abd al-Raḥmān bin Zayd bin Aslam ada menegaskan bahawa:

*Maksud penyakit hati dalam ayat ini ialah penyakit berkaitan agama seperti kafir, munafik dan sebagainya bukan penyakit pada jasad atau badan.”<sup>12</sup>*

<sup>9</sup> Al-Jurjānī (2002), *al-Ta`rīfāt*, Beirut: Dār al-Kutub al-`Ilmiyyah, h. 105.

<sup>10</sup> Al-Ghazālī (t.t.), *Iḥyā' `Ulūm al-Dīn*, juz.3, t.tp: t.p., h..56.

<sup>11</sup> Surah al-Baqarah 2:10.

<sup>12</sup> Ibn Kathīr (1992), *Tafsīr al-Qur'an al-`Aẓīm*, juz.1, Beirut: Dār al-Fikr, h. 66.

Perbuatan buruk sama ada pada agama atau melalui jasad kedua-duanya adalah dikira akhlak buruk.

## **DARIPADA MANAKAH BERMULA AKHLAK?**

Sesungguhnya Rasulullah s.a.w. dibangkitkan oleh Allah S.W.T. kepada umat ini selain daripada untuk menyeru umat kepada mengabdikan diri kepada Allah S.W.T. semata-mata. Baginda juga diutuskan untuk memperbaiki akhlak umat ini. Dengan ini akhlak merupakan suatu perkara yang penting dalam kehidupan manusia, bahkan kemuliaan dan penghormatan satu-satu bangsa atau umat adalah kerana akhlaknya.

Menghormati kedua ibu-bapa serta beradab terhadap mereka berdua merupakan titik tolak kemuliaan akhlak bagi seseorang. Ini kerana merekalah yang sanggup bersusah payah semenjak dalam kandungan sehinggalah pada saat kelahirannya. Allah S.W.T. mewajibkan ke atas kita menggauli kedua ibu bapa dengan suatu pergaulan yang khusus serta berbeza dengan pergaulan kita terhadap orang lain. Firman Allah S.W.T. yang bermaksud:<sup>13</sup>

*Dan Tuhanmu telah memerintahkan supaya kamu jangan menyembah selain Dia dan hendaklah kamu berbuat baik terhadap dua ibu-bapa kamu dengan sebaik-baiknya. Jika salah seorang daripada keduanya atau kedua-duanya sampai kepada usia yang lanjut dalam pemeliharaanmu, maka janganlah sekali-kali kamu mengatakan kepada keduanya perkataan ah dan janganlah kamu membentak mereka dan ucapkanlah kepada mereka perkataan yang sopan dan mulia.*

Seorang anak sama ada lelaki atau perempuan hendaklah bercakap dengan kedua ibu-bapa mereka dengan lemah-lembut, beradab sopan serta berkasih sayang. Begitu juga hendaklah menjauhi daripada perkataan yang buruk serta tidak baik yang mana boleh membuatkan kedua ibu-bapa itu tidak senang serta tidak selari dengan hati, serta hendaklah anak-anak itu berusaha melakukan perkara yang boleh menggembarakan hati mereka berdua itu. Jika ibu-bapa berdua itu sangat memerlukan kepada nasihat agama, maka menasihatiilah mereka dengan lemah-lembut serta beradab.<sup>14</sup>

Begitu juga bersopan atau bermoral terhadap saudara mara atau ukhawah, jiran tetangga, dan manusia pada umumnya, sama ada dalam

<sup>13</sup> Surah al-Isrā' 17:23-24.

<sup>14</sup> `Abdah Ghālib Aḥmad `Īsā (1987), *Adāb al-Mu`āmalah Fī al-Islām*, Beirut: Dār. al-Jayl, h. 81-82

kenderaan, tempat kerja, dan sebagainya adalah termasuk akhlak mulia. Ini adalah kerana manusia itu mempunyai dua hubungan iaitu hubungan dengan Allah S.W.T. dan hubungan sesama manusia. Tidak sempurna hubungan kita kalau semata-mata baik hubungan hanya dengan Allah S.W.T. tanpa manusia dan begitu juga sebaliknya. Bahkan hendaklah kedua-dua hubungan itu seimbang atau seirata di antara satu sama lain. Allah S.W.T. sentiasa memberkati mereka yang menghayati nilai akhlak dalam kehidupannya. Jika pelajar sentiasa menghayati akhlak mereka akan memperolehi kecemerlangan dalam pencapaian akademik kerana akhlak dapat mengesan serta memandu seseorang pelajar ke arah kemajuan dan cemerlang serta mencapai keberkatan Allah S.W.T.

## **CIRI-CIRI KEBERKESANAN AKHLAK YANG MENDORONG KEPADA KEMULIAAN KEHIDUPAN MANUSIA**

Seorang insan itu bila dikesani oleh akhlak Islamiyah yang sempurna serta istimewa, maka ia akan mendorong seorang itu bersikap baik serta tidak lagi melakukan penyelewengan terhadap perintah Allah S.W.T.. Dan jika seseorang itu tidak menyelewengi perintah Allah S.W.T. itu, maka sudah tentu apa-apa kerja yang mahu dilakukan lebih-lebih lagi menjalani kehidupan akan merasai ketenteraman, keharmonian dan kebahagiaan. Antara keberkesanan akhlak terhadap diri seseorang adalah seperti berikut:

### **1. Benar dan jelas dalam pertuturan<sup>15</sup>**

Seseorang itu bila dikesani dengan akhlak yang mulia akan berlaku perubahan pada percakapan iaitu sentiasa bercakap benar serta jelas. Ini terbukti dari hadith Rasulullah s.a.w. yang diriwayatkan oleh Imam Mālik dalam *Muwatṭā'* yang membawa maksud bahawa selagi seorang hamba bercakap dusta atau berusaha untuk berdusta, maka terlekat pada hatinya suatu titik hitam hingga menyelembungi hatinya, maka tercatat di sisi Allah S.W.T. dari golongan orang yang berdusta. Dengan ini jelas dusta itu dapat menyelubungi hati dari sinaran cahaya hidayat Allah S.W.T.. Mereka yang dikesani oleh akhlak yang mulia akan memelihara percakapan, jauh dari dusta dan sebagainya sentiasa mendapat hidayat dan keberkatan dari Allah S.W.T.. Melalui percakapan yang betul dan jelas ini sudah tentu akan mencapaikan suatu kemuliaan dan kehormatan bagi kehidupan manusia ini.

---

<sup>15</sup> Wahbah al-Zuhaylī (2000), *al-Ushrah al-Muslimah Fī al-`Ālam al-Mu`āṣir*, Beirut: Dār al-Fikr al-Mu`āṣir, h. 29-30.

## 2. Beramanah<sup>16</sup>

Seseorang yang berakhlak baik akan menjadikan dirinya juga beramanah, tidak curang dalam muamalat dan sebagainya. Ini kerana curang dan mengkhianati amanah itu setengah daripada alamat orang munafik. Dengan ini jelas mengkhianati amanah adalah setengah daripada alamat orang munafik. Orang yang berakhlak baik sudah tentu menjauh diri dari sifat ini. Dan dengan menjauhi sifat ini sudah tentu akan mencapai kemuliaan terhadap seseorang itu sama ada di dunia atau akhirat.

## 3. Bersemangat dan bercita-cita tinggi<sup>17</sup>

Islam agama yang menyeru umatnya supaya bercita-cita tinggi. Melihat kepada masa hadapan tidak menoleh kebelakang. Inilah melambangkan Islam adalah agama bertamadun. Terdapat dalam al-Qur'an beberapa ayat yang mengajak manusia membuat renungan dan berfikir serta bersedia untuk masa hadapan, diantaranya firman Allah S.W.T. yang bermaksud:<sup>18</sup>

*Wahai orang yang beriman berbaktilah kepada Allah S.W.T. dan hendaklah setiap jiwa memperhatikan apa yang ia telah sediakan untuk esok.*

Ibn Kathir ada menegaskan mengenai ayat ini bahawa hendaklah kamu menghisabkan diri kamu sebelum kamu dihisabkan di hari akhirat nanti, dan hendaklah kamu lihat apakah yang kamu telah simpankan untuk diri kamu daripada amalan soleh untuk hari tempat kamu kembali, dan kamu di kemukakan untuk Tuhan kamu.<sup>19</sup> Seseorang yang bersemangat dan bercita-cita tinggi yang sentiasa memikirkan masa hadapan tergolong daripada mereka yang berakhlak mulia juga. Melalui semangat dan cita-cita tinggi yang ada pada seseorang itu dapat memajukan seseorang seterusnya mencapai kemuliaan juga.

## 4. Memelihara lidah<sup>20</sup>

Seseorang yang dikesani oleh akhlak yang mulia akan memelihara lidahnya dari mengatakan kata-kata yang tidak baik. Bahkan sentiasa membiasakan lidah dengan kata-kata yang baik. Ini jelas dilihat dari Hadith Rasulullah s.a.w. yang mana diriwayatkan oleh al-Bukhārī yang menjelaskan sesiapa

<sup>16</sup> *Ibid.*.

<sup>17</sup> *Ibid.*.

<sup>18</sup> Surah al-Ḥasyr 59:18.

<sup>19</sup> Ibn Kathir (1992), *op.cit.*, juz.3, h. 414.

<sup>20</sup> Wahbah al-Zuhaylī (2000), *Op.cit.*, h. 29-30.

yang beriman terhadap Allah S.W.T. dan hari akhirat, maka hendaklah ia berkata tentang kebaikan, kalau tidak hendaklah ia berdiam diri. Dengan memelihara lidah selain dari melepaskan diri dari menyakiti orang ia juga mendapat keberkatan dari Allah S.W.T.. Bila mendapat keberkatan sudah tentu akan mencapai kemuliaan dari Allah S.W.T..

### **5. Membersihkan diri dari hasad dengki dan dendam<sup>21</sup>**

Seorang mukmin yang dikesani oleh akhlak yang mulia akan menghakiskan segala sifat kecelaan, bahkan membersihkan diri dari hasad dengki dan dendam. Malah sentiasa beradab dan bersopan santun. Keberkatan akhlak yang baik membuatkan manusia tidak lagi mempunyai sifat hasad dengki dan dendam. Seterusnya mencapai kemuliaan sama ada dalam kehidupan ini atau akhirat. Dengan berteraskan kepada akhlak yang baik akan mewujudkan sebuah masyarakat yang tenang, tenteram serta harmoni dan seterusnya sentiasa memperolehi kemuliaan Allah S.W.T..

### **6. Melahirkan pengorbanan**

Seseorang bila dikesani oleh akhlak yang baik menjadikan seseorang itu pemurah dan pemberi tanpa perlu menunggu manfaat atau maslahat keduniaan. Atau dalam erti kata lain, tidak berharap memperolehi nikmat dengan segera. Ini kerana tujuannya adalah semata-mata taat kepada Allah S.W.T. atau beriman kepadanya. Apabila seseorang itu betul-betul berakhlak mulia, ia tidak akan merasa lemah lagi dari berusaha bersungguh-sungguh untuk melakukan sesuatu di dunia ini sekalipun terpaksa menggorbankan setiap apa yang dimiliki dalam kehidupan ini. Mereka berjihad di jalan Allah S.W.T. dengan hartanya dan dirinya semata-mata kerana Allah S.W.T.. Allah S.W.T. berfirman yang bermaksud:<sup>22</sup>

*Orang-orang yang beriman hanyalah orang-orang yang beriman kepada Allah S.W.T. dan Rasulnya, kemudian mereka tidak ragu-ragu dan mereka berjihad dengan harta dan jiwa mereka pada jalan Allah S.W.T. Mereka itulah orang-orang yang benar.*

Mereka yang memelihara akhlak serta keimanannya terhadap Allah S.W.T. tidak melakukannya kerana tujuan untuk mendapat balasan dunia. Bahkan mereka sentiasa bertekad akan menghadapi berbagai cabaran demi melaksanakan apa yang disuruh oleh Allah S.W.T.. Dengan ini mereka akan memperolehi janji Allah S.W.T. dengan balasan yang baik serta besar di akhirat

---

<sup>21</sup> *Ibid.*

<sup>22</sup> Surah al-Hujurat 49:15.

nanti. Melalui akhlak yang mulia itu dapat melahirkan seseorang itu bersikap suka berkorban kerana Allah S.W.T.. Jika seseorang itu bersikap demikian dalam kehidupan duniawi ini, maka sudah tentu mereka akan memperolehi suasana yang tenteram, bahagia dan harmoni dan seterusnya mencapai kemuliaan kerana kehidupan dunia ini sangat memerlukan pengorbanan di antara satu sama lain. Dengan ini berakhlak mulia amat berkait rapat dalam membahagiakan kehidupan ini.

## 7. Berperikemanusiaan

Kesan akhlak mulia juga dapat menjadikan manusia itu berperasaan peri kemanusiaan atau berbuat baik dalam menggauli kaum kerabat mereka sama ada mereka itu kerabat dari pihak ayah atau anak atau saudara mara yang mempunyai hubungan kekeluargaan.<sup>23</sup> Allah S.W.T. menyuruh umatnya supaya beradab atau berbuat baik terhadap kedua-dua ibubapa lebih daripada orang lain kerana kedua ibubapalah yang berperanan dalam kehidupan mereka. Menurut al-Shaykh `Alī al-Ṣābūnī, para ahli tafsir mengatakan bahawa perkaitan antara beribadah kepada Allah S.W.T. dengan berbuat baik terhadap kedua ibubapa adalah untuk menunjukkan hak mereka berdua yang besar terhadap anak kerana mereka berdua sebagai penyebab zahir bagi ada anak. Oleh kerana ihsan atau kebaikan kedua ibubapa itu terhadap anak sangat tinggi serta besar, maka wajiblah bagi anak berbuat baik terhadap kedua ibubapa mereka.<sup>24</sup> Dengan ini wajib bagi orang mukmin untuk berusaha menjaga kedua ibubapa mereka dengan baik, mengelak mereka berdua dari merasa sedih atau penat. Bila perasaan perikemanusiaan bertapak dalam diri seseorang sudah tentu akan melahirkan perasaan saling menghormati serta menyayangi di antara satu sama lain. Lebih-lebih lagi dalam kehidupan ini bila seseorang saling memahami serta bertolak ansur terhadap satu sama lain sudah tentu keharmonian dan kemuliaan kehidupan akan meningkat serta ketenteraman akan terus terpupuk. Inilah kelebihan perikemanusiaan dalam kehidupan ini yang lahir dari kesan akhlak yang baik itu. Sungguh pentingnya akhlak dalam kehidupan manusia.

---

<sup>23</sup> Dr. Muḥammad Shāmah (t.t.), *al-Islām Dīn wa Dunyā*, Kaherah, h. 129.

<sup>24</sup> Muḥammad `Alī al- Ṣābūnī (1997), *Ṣafwah al-Tafāsīr*, juz.3, Kaherah: Dār al-Ṣābūnī, h.145.



## 8. Lemah lembut serta berkeperihatinan

Kesan akhlak mulia dalam diri seseorang dapat mendorongnya kepada suka melakukan kebaikan terhadap orang lain sama ada kerabat atau tidak, berjiran atau bukan jiran.<sup>25</sup> Allah S.W.T. berfirman yang bermaksud:<sup>26</sup>

*Sembahlah Allah S.W.T. dan janganlah kamu mempersekutukanNya dengan sesuatupun. Berbuat baiklah terhadap dua ibubapa, kerabat karib, anak yatim, orang miskin, jiran yang dekat atau yang jauh, teman sejawat, ibn sabil dan hamba sahayamu.*

Keluarga merupakan orang yang perlu dicurahkan dengan kelembutan. Malah isteri yang sentiasa berada bersama suami dalam kehidupan ruhmahtangga merupakan penenang kepadanya. Firman Allah S.W.T. yang bermaksud:<sup>27</sup>

*Dan di antara tanda-tanda kekuasaannya ialah Dia menciptakan untukmu isteri-isteri dari jenismu sendiri supaya kamu cenderung dan merasa tenteram kepadanya. Dan dijadikannya di antaramu rasa kasih dan sayang. Sesungguhnya pada yang demikian itu benar-benar terdapat tanda-tanda bagi kaum yang berfikir.*

Al-Shaykh `Alī al-Ṣābūnī berkata:<sup>28</sup>

*Antara tanda yang menunjukkan kebesaran dan kesempurnaan kekuasaan Allah S.W.T. ialah menciptakan wanita kepada kamu yang mana terdiri dari jenis kamu juga, bukan dari jenis yang lain. Dan jikalau Allah S.W.T. menciptakan wanita dari jenis lain nescaya berlaku perselisihan dan tidak dapat menyesuaikan diri.*

Dengan ini Islam menyuruh umatnya supaya melakukan hubungan antara manusia yang dibina di atas pergaulan yang baik, berlemah-lembut, memelihara hak dan tanggungjawab di antara satu sama lain. Jika seseorang itu mengikut apa yang diajarkan oleh Islam nescaya kehidupan ini akan sentiasa tenang, tenteram dan harmoni serta mencapai kemuliaan.

## 9. Melakukan pekerjaan yang baik

Seorang yang bermoral sudah tentu akan melakukan pekerjaan yang baik. Tidak lagi mahu melakukan pekerjaan yang tidak baik atau buruk.<sup>29</sup> Pekerjaan

<sup>25</sup> Dr. Muḥammad Shāmah (t.t.), *Op.cit.*, h.129.

<sup>26</sup> Surah al-Nisā' 4: 36.

<sup>27</sup> Surah al-Rūm 30:21.

<sup>28</sup> al-Shaykh Muḥammad `Alī al-Ṣābūnī (1997), *op. cit.*, juz.2, h. 438.

<sup>29</sup> Dr. Muḥammad Shāmah (t.t.), *Op.cit.*, h.135.

yang baik merupakan amal salih, justeru itu pekerjaan yang baik atau amal salih disebut beberapa kali dalam al-Qur'an. Antaranya menyuruh melakukannya dengan diberi balasan baik dari Allah S.W.T. dimana Allah S.W.T. berfirman yang bermaksud:<sup>30</sup>

*Sesungguhnya orang yang beriman serta mengerjakan amal salih, mendirikan sembahyang dan mengeluarkan zakat, mereka mendapat pahala di sisi Tuhannya, mereka juga tidak takut serta bersedih hati.*

Ketika mentafsirkan ayat ini al-Shaykh `Alī al-Ṣābūnī berkata:<sup>31</sup>

*Iaitu orang mukmin, mereka beriman kepada Allah S.W.T. serta melakukan berbagai amal yang salih termasuk sembahyang dan mengeluarkan zakat. Maka bagi mereka balasan yang sempurna di dalam syurga, mereka tidak takut pada hari yang sangat susah, dan mereka juga tidak menyesal apa yang mereka luput dari dunia.*

Allah S.W.T. menyebut tentang amal salih beberapa kali dalam al-Qur'an. Ini jelas membuktikan bahawa pekerjaan yang baik atau amal salih itu sangat penting serta mempunyai peranan yang drastik dalam kehidupan manusia sama ada di dunia atau akhirat. Ini kerana iltizam seseorang dalam melakukan amal salih dengan sempurna akan menjadi baik terhadap kehidupannya di dunia ini atau di akhirat.

Persoalan tentang adakah amal salih ini hanya tertentu pada ibadat sahaja boleh dijawab dengan menafikannya. Bukan amal salih itu dikhususkan kepada ibadat yang wajib atau sunat sahaja. Bahkan termasuk ibadat yang disifatkan sebagai amalan dunia. Al-Qur'an ketika menyebut tentang amal salih tidak menentukan ia adalah ibadat sahaja, malah ia mencakupi setiap pekerjaan yang baik serta dilakukan oleh manusia di dunia ini termasuk pertanian dan pertukangan. Petani yang bekerja dengan kemahirannya di sawah juga boleh dikatakan beramal salih jika dapat memberi faedah yang banyak terhadap dunia seperti menyelesaikan masalah kurang makanan dalam masyarakat.

## **10. Berfikiran logik**

Islam sangat memberi keutamaan terhadap akal kerana ia dapat membantu individu membentuk dirinya, kemudian menunjukinya ke arah melakukan kebaikan di dunia ini. Bahkan akal mampu mendorong diri manusia untuk mengkaji dan membuat penyelidikan di pelbagai bidang serta mencari dan

<sup>30</sup> Surah al-Baqarah 2:277.

<sup>31</sup> al-Shaykh Muḥammad `Alī al-Ṣābūnī (1997), *op. cit.*, juz.2, h. 438..

menyelami rahsiannya. Dengan ini mereka yang menyelami untuk mencari rahsia kehidupan ini, akhirnya sampai kepada peringkat pengenalan terhadap Allah S.W.T., Pencipta alam ini serta Pentadbirnya. Dalam al-Qur'an terdapat sebanyak 17 ayat yang menggalak manusia supaya berfikir terhadap dirinya dan juga kejadiannya. Kesemua ini dapat membuktikan bahawa kerja akal yang logik adalah berfikir sehingga mengenali Allah S.W.T., Pencipta makhluk ini. Antara firman Allah S.W.T. yang menyeru manusia supaya berfikir, ialah ayat yang mengajak manusia memikir tentang *āyāt* Allah S.W.T. sepertimana Allah S.W.T. berfirman yang bermaksud: "*Demikian itu telah dinyatakan oleh Allah S.W.T. akan ayatnya mudah-mudahan kamu berfikir*".<sup>32</sup> Melalui akhlak yang mulia atau iman yang kental dapat memindahkan watak manusia daripada sifat kebinatangan kepada kedudukan para malaikat. Mereka akan mempunyai kekuatan dalam menghadapi kesusahan dan cabaran hidup. Ia mendorong seseorang untuk terus beramal dan mengeluarkan produk yang istimewa, menyumbang kebaikan dalam kehidupan secara berterusan, malah sentiasa mara ke hadapan tanpa mundur ke belakang. Jika seseorang itu berfikiran logik serta matang, maka sudah tentu dapat membantu untuk kesejahteraan dan keharmonian hidup. Dengan ini jelas akhlak sangat penting dalam kehidupan manusia.

## 11. Kepentingan berdialog

Para muslimin keluar dari Semenanjung Tanah Arab membawa Kitab Allah S.W.T. dan Sunnah Rasulullah s.a.w. serta fikiran mereka yang telah diasuh dan dididik oleh Rasulullah s.a.w.. Maka mereka berdakwah kepada penduduk di satu-satu tempat dengan hikmah dan nasihat yang baik serta bertolak ansur. Mereka tidak menggunakan kekerasan atau kekuatan untuk memaksa mereka memeluk agama Islam. Bahkan mereka berdialog dengan mereka secara baik.<sup>33</sup>

Allah S.W.T. menyuruh umat manusia supaya berdialog secara baik. Ini jelas dilihat dari firman Allah S.W.T. yang bermaksud:<sup>34</sup>

*Dan berbantahlah mereka dengan cara yang baik. Berbantah hampir sama dengan berdialog yang mana kedua-keduanya saling memerlukan cara yang baik.*

Jika sikap suka berdialog secara baik atau beradab dapat direalisasikan ke dalam kehidupan ini, sudah tentu akan menjadikan kehidupan ini penuh dengan kerukunan, keharmonian dan ketenangan. Ia juga akan mewujudkan

<sup>32</sup> Surah al-Baqarah 2:219.

<sup>33</sup> Dr. Muḥammad Shāmah (t.t.), *Op.cit.*, h.165.

<sup>34</sup> Surah al-Nahl 16:125.

sikap saling menghormati dan saling redha meredhai di antara satu sama lain yang mana seterusnya mendapat keberkatan serta keredhaan dan kemuliaan dari Allah S.W.T..

## 12. Berukhuwah dan tolong menolong

Jika seseorang Islam itu melazimi serta melaksanakan akhlak mulia sebagaimana yang dianjurkan oleh al-Qur'an al-Karim, maka akan lahir perasaan lemah lembut, hormat menghormati sesama manusia serta akan terhindar sikap suka menyakiti orang lain seperti menjatuhkan maruah seseorang atau menahan dan menyekat kebebasan seseorang. Oleh itu akan lahir masyarakat yang bersaudara, berkasih sayang dan bersimpati terhadap yang lain. Allah S.W.T. berfirman yang bermaksud: "*Sesungguhnya orang mukmin adalah bersaudara.*"<sup>35</sup>

Ketika mentafsirkan ayat ini Ibn Kathīr berkata: "Semua manusia adalah bersaudara dalam agama."<sup>36</sup> Al-Shaykh `Alī al-Ṣābūni turut berkata: "Iaitu tidak dikatakan mukmin itu kecuali persaudaraan yang dapat mengumpulkan di antara mereka suatu ikatan iman, dan tidak patut berlaku di antara mereka, permusuhan dan perseteruan serta tidak boleh memarahi dan membunuh terhadap satu sama lain."<sup>37</sup> Selain itu, para *mufasssirin* juga berkata: "Kalimah *Laif*" digunakan untuk menyekat, seperti dikatakan: tidak ada persaudaraan kecuali di antara para mukminin sahaja, dengan ini tidak ada persaudaraan di antara orang mukmin dan kafir sama sekali."<sup>38</sup>

Dengan ini jelas bahawa persaudaraan dalam Islam lebih kuat daripada persaudaraan dari segi nasab dan keturunan. Bertitik tolak daripada persaudaraan lahiriah sifat tolong menolong di antara satu sama lain, berkongsi gembira dan sedih, tidak melampaui batas serta zalim, memberi mereka yang mempunyai hak akan haknya, tidak zalim dan menyakitinya. Oleh itu, dapat dilihat sekiranya perasaan ini dapat diterapkan dalam kehidupan manusia, maka mereka akan mencapai kemuliaan, ketenangan, keharmonian dan kesejahteraan.

---

<sup>35</sup> Surah al-Ḥujurāt 49:10.

<sup>36</sup> Ibn Kathīr (1992), *op.cit.*, juz 4, h. 254.

<sup>37</sup> al-Shaykh Muḥammad `Alī al-Ṣābūni (1997), *op. cit.*, juz 3, h. 216.

<sup>38</sup> *Ibid.*.

## **KESIMPULAN**

Akhlak merupakan warisan maknawi yang ditinggalkan oleh Rasulullah s.a.w. kepada umatnya. Ia sangat berperanan terhadap seseorang dalam melahirkan seorang insan yang cemerlang sama ada di dunia atau akhirat. Seseorang akan berubah ke arah kebaikan jika ia menghayati nilai moral dalam kehidupannya kerana akhlak mulia dapat memberikan kesan yang penting serta positif terhadap kehidupan manusia. Kehidupan ini akan bertambah tenang, mempunyai kerukunan dan ketenteraman, malah mendapat kemuliaan daripada Allah S.W.T.. Dengan ini kita hendaklah mengutamakan akhlak mulia dalam segala perbuatan di dunia ini.